



## 1988

15. A **Celso Macor**,  
«Premi San Roc» pal 1988

Amì Fidât, Poeta e Scritôr Furlan 'Navora Preseât

A' son ains che jo 'a scolti  
la tô vôs sgarfâ ta plais  
dal nestri vivi disuman;  
ch'a cognos al to lancûr  
pal mont dai tîoi afiez di frut,  
piardût par simpri là, su li' rivis  
da Viarsa ch'a nulisin ancjamò  
di violis, di pampui, di fen  
lassât secjâ sot al soreli.  
Mi pâr di vioditi tirâ peis  
sul pêl da l'aga o corigi daûr  
ai grivòns leâz cul fil:  
un cori daûr dai siums  
dai desideris che no àn mai fin.  
Sinti la tô vôs d'in prin alzâsi  
debula, come un ciscâ di scriz,  
e doventâ man man un urli  
par denunciâ li' situazions  
ledrosis di ogni dì.  
Tu sês la vôs dal Friûl dismenteât,  
dai vîs ch'a còntin pôc,  
dai muarz bessôi lontan  
tai simiteris di Bosnia

e di Galizia, colpevui sôl  
di jessi stâz tra chei che àn piardût.  
Tu sês la vôs universâl  
ch'a cjanta 'l uarêsi ben;  
ch'a rispieta la vita, la natura;  
ch'a s'ingrapa ae marilenga  
e, come erula, a la sô tiara.  
Grazie Celso, par chist impegn  
ch'al ti jempla li' zornadis.

Guriza, ai 20 di novembar dal 1988

Ana di Fara  
(Anna Bombig)